



REPUBLIKA E SHQIPËRISË  
KËSHILLI I EMËRIMEVE NË DREJTËSI

VENDIM

Nr. 14, datë 17.07.2020

**PËR NDALIMIN E KANDIDIMIT TË ZOTIT BESNIK MUÇI, NË VENDIN VAKANT PËR GJYQATAR NË GJYKATËN KUSHTETUESE, VAKANCË E PARAKOHSHME, TË SHPALLUR NGA PRESIDENTI I REPUBLIKËS NË DATË 07.02.2018 DHE RISHPALLUR NË DATË 27.09.2019**

Këshilli i Emërimeve në Drejtësi, i përbërë nga :

<b>Vitore Tusha</b>	- Zëvendëskryetare
<b>Fiona Papajorgji</b>	- Anëtare
<b>Arta Marku</b>	- Anëtare/Relatore
<b>Miranda Andoni</b>	- Anëtare
<b>Saida Dollani</b>	- Anëtare
<b>Ludovik Dodaj</b>	- Anëtar
<b>Fatjona Memçaj</b>	- Anëtare
<b>Arjan Qafa</b>	- Anëtar

Asistuar nga sekretare **Dorina Dulaj**,

Me praninë e Avokates së Popullit, **znj. Erinda Ballanca**, në cilësinë vëzhguesit të përhershëm të mbledhjeve dhe veprimtarisë së Këshillit të Emërimeve në Drejtësi,  
Me praninë e përfaqësuesve të autorizuar të subjekteve të ftuara sipas ligjit për pjesëmarrje, në cilësinë e vëzhguesve, në mbledhjen e Këshillit:

- **z. Bledar Dervishaj**, përfaqësues i autorizuar i Presidentit të Republikës,
- **znj. Katrin Treska**, përfaqësuese e autorizuar e Presidentit të Republikës,
- në mungesë të përfaqësuesve të tjerë të subjekteve të ftuara sipas ligjit për pjesëmarrje,

në mbledhjen e datës 17.07.2020, mori në shqyrtim çështjen që i përket:

**KANDIDATI PËR GJYQATAR  
NË GJYKATËN KUSHTETUESE:**

**z. Besnik MUÇI,**

**OBJEKTI:**

**Urdhërimi i ndalimit të kandidimit të z. Besnik Muçi, në vendin vakant për gjyqtar në Gjykatën Kushtetuese, të shpallur nga Presidenti i Republikës në datën 07.02.2018 dhe rishpallur në datën 27.09.2019.**

## KËSHILLI I EMËRIMEVE NË DREJTËSI

Pasi dëgjoi relatimin e anëtares së Këshillit, **Arta Marku**, mendimin e paraqitur nga Avokati i Popullit, znj. Erinda Ballanca, në cilësinë e vëzhgueses së përhershme në mbledhjen dhe veprimtarinë e Këshillit të Emërimeve në Drejtësi, lidhur me mënyrën e procedimit të ndjekur për verifikimin e kandidatit, dhe si bisedoi çështjen në tërësi,

### VËREN:

#### I. Rrethanat e çështjes

1. Në zbatim të nenit 125 të Kushtetutës dhe të pikës 1 të nenit 7/b të ligjit nr. 8577, datë 10.02.2000 “*Për organizimin dhe funksionimin e Gjykatës Kushtetuese të Republikës së Shqipërisë*”, të ndryshuar (në vijim ligji nr. 8577/2000), Presidenti i Republikës më datë 07.02.2018 ka shpallur hapjen e procedurës së aplikimeve për plotësimin e vendit vakant, vakancë e parakohshme të krijuar në Gjykatën Kushtetuese për shkak të mbarimit përpara afatit ligjor të mandatit të gjyqtarit Besnik Imeraj.

2. Në përfundim të procedurës së aplikimeve për shprehjen e interesit për kandidim, Presidenti i Republikës i ka dërguar Këshillit të Emërimeve në Drejtësi aplikimet e kandidatëve të shoqëruara me dokumentet e paraqitura prej tyre për përmbushjen e kushteve dhe kriterëve ligjore të përcaktuara në nenin 7/a të ligjit nr. 8577/2000.

3. Ndërmjet kandidatëve që kanë shprehur interesin për plotësimin e këtij vendi vakant të krijuar në Gjykatën Kushtetuese është edhe z. Besnik Muçi.

4. Në zbatim të neneve 125 dhe 149/d të Kushtetutës, të pikës 2 të nenit 7/b të ligjit nr. 8577/2000, të neneve 229, pika 1, 234, 235, 236, 237, 239 e 240 të ligjit nr. 115/2016 “*Për organet e qeverisjes së sistemit të drejtësisë*” (në vijim ligji nr. 115/2016), si edhe të pikës 98 të Vendimit të Këshillit të Emërimeve në Drejtësi nr. 4, datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, Këshilli i Emërimeve në Drejtësi, në mbledhjen e zhvilluar më datë 05.04.2019, vendosi fillimin e procedurave të verifikimit, vlerësimit, pikëzimit dhe renditjes së kandidatëve që kanë shprehur interesin për vendet vakante të krijuara në Gjykatën Kushtetuese.

5. Në zbatim të nenit 228 të ligjit nr. 115/2016 dhe të pikave 5, 27 deri 37 dhe 41 të Vendimit të Këshillit të Emërimeve në Drejtësi nr. 2, datë 15.02.2019 “*Për procedurën e shortit të caktimit të relatorëve për pozicionet vakante në çdo institucion*”, si edhe të pikës 4 të Vendimit të Këshillit të Emërimeve në Drejtësi nr. 4, datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, në të njëjtën ditë të mbledhjes së zhvilluar më datë 05.04.2019, është realizuar edhe procedura për caktimin me short manual të relatorëve për secilin nga vendet vakante të krijuara në Gjykatën Kushtetuese dhe për Inspektor i Lartë i Drejtësisë.

6. Sipas rezultatit të shortit manual të realizuar nga Këshilli i Emërimeve në Drejtësi, lidhur me vendin vakant në Gjykatën Kushtetuese, vakancë e parakohshme, të shpallur nga Presidenti i Republikës në datën 07.02.2018, relator për ndjekjen e procedurave të verifikimit, vlerësimit, pikëzimit dhe renditjes së kandidaturave, është caktuar anëtari i Këshillit, Eriol Roshi.

7. Z. Besnik Muçi, si njëri ndër kandidatët që ka shprehur interesin për vendin vakant të sipërcituar në Gjykatën Kushtetuese, në zbatim të pikës 22 të Vendimit të Këshillit të Emërimeve në Drejtësi me nr. 4, datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, është njoftuar me shkrim për t’u paraqitur pranë Këshillit për të vijuar me përmbushjen e procedurave të verifikimit të kandidaturës. Njoftimi me shkrim, i kryer në rrugë elektronike në adresën e deklaruar nga vetë kandidati Besnik Muçi, gjendet i administruar në dosjen e kandidatit.

8. Në datën 08.04.2019, kandidati Besnik Muçi është paraqitur pranë Këshillit të Emërimeve në Drejtësi dhe është pajisur me formularët e deklarimit dhe autorizimet që duhet të plotësohen për qëllimet e vijimit të procedurës së verifikimit të kandidaturës së tij. Kryerja e kësaj procedure vërtetohet nga nënshkrimi prej vetë kandidatit të deklaratës përkatëse, e cila gjendet e administruar në dosjen e kandidatit.

9. Në datën 12.04.2019, kandidati Besnik Muçi ka depozituar në sekretarinë e Këshillit të Emërimeve në Drejtësi formularët e deklarimit dhe autorizimet përkatëse për qëllimet e vijimit të procedurës së verifikimit të kandidaturës së tij, të cilat gjenden të administruara në dosjen e kandidatit.

10. Këshilli i Emërimeve në Drejtësi, me vendimin nr. 70, datë 24.07.2019 ka vendosur:

*“1. Lejimin e kandidimit të kandidatit Besnik Muçi, në vendin vakant për gjyqtar në Gjykatën Kushtetuese, vakancë e parakohshme, të shpallur nga Presidenti i Republikës në datën 07.02.2018.....”.*

11. Këshilli i Emërimeve në Drejtësi, në përfundim të procedurës së verifikimit dhe të vlerësimit, për vakancën e shpallur nga Presidenti i Republikës, më datë 07.02.2018, me vendimin nr. 137, datë 21.09.2019, vendosi:

- Pezullimin e procedurës së verifikimit të kandidaturave dhe njoftimin e subjektit që e ka vënë në lëvizje, Presidentin e Republikës për të vlerësuar rishpalljen e thirrjes për paraqitjen e kandidaturave për plotësimin e vendit vakant në Gjykatën Kushtetuese, vakancë e parakohshme, të shpallur me dekretin nr.10723, datë 07.02.2018 nga Presidenti i Republikës.

12. Në zbatim të vendimit nr. 137, datë 21.09.2019 të Këshillit të Emërimeve në Drejtësi, të nenit 125 të Kushtetutës dhe të pikës 1 të nenit 7/b të ligjit nr. 8577/2000, Presidenti i Republikës, më datë 27.09.2019, ka rishpallur hapjen e procedurës së aplikimeve për plotësimin e vendit vakant, vakancë e parakohshme, të krijuar në Gjykatën Kushtetuese pas mbarimit përpara afatit ligjor të mandatit të gjyqtarit Besnik Imeraj.

13. Në përfundim të procedurës së aplikimeve për shprehjen e interesit për kandidim, Presidenti i Republikës i ka dërguar Këshillit të Emërimeve në Drejtësi aplikimet e kandidatëve të shoqëruara me dokumentet e paraqitura prej tyre për përmbushjen e kushteve dhe kriterëve ligjore të përcaktuara në nenin 7/a të ligjit nr. 8577/2000.

14. Në vijim, Këshilli i Emërimeve në Drejtësi, me vendimin nr.138, datë 22.10.2019, vendosi:

- Revokimin e vendimit nr. 137, datë 21.09.2019 dhe vijimin e procedurave të verifikimit dhe vlerësimit të kandidaturave për plotësimin e vakancës së parakohshme të shpallur nga Presidenti i Republikës me dekretin nr.11291, datë 27.09.2019.

15. Për shkak të përfundimit të mandatit të Këshillit të Emërimeve në Drejtësi (i përkohshëm) 2019, zhvillimi i procedurave të verifikimit për këtë pozicion vakant i kaloi Këshillit të Emërimeve në Drejtësi 2020, i cili në datë 15.01.2020 zhvilloi shortin manual dhe relator për ndjekjen e procedurave të verifikimit, vlerësimit, pikëzimit dhe renditjes së kandidaturave, është caktuar anëtarja e Këshillit, Arta Marku. Sipas parashikimit të pikës 5/2, shkronja “b”, të vendimit nr. 4, datë 11.3.2019, të ndryshuar, të Këshillit të Emërimeve në Drejtësi, relatorja kontrolloi saktësinë dhe plotësinë e veprimeve të kryera dhe konfirmoi veprimet e kryera nga relatorët e mëparshëm.

16. Rezulton, gjithashtu, se kandidati Besnik Muçi ka kandiduar edhe për vendin vakant në Gjykatën Kushtetuese (vakancë e plotë) e shpallur nga Presidenti i Republikës me dekretin nr. 10722, datë 07.02.2018. Me vendimin nr. 72, datë 24.07.2019, Këshilli i Emërimeve në Drejtësi ka vendosur lejimin e kandidimit të kandidatit Besnik Muçi. Presidenti i Republikës, pasi u njoh me Listën përfundimtare të renditjes së kandidatëve të lejuar për kandidim dhe raportin e arsyetuar të renditjes së tyre, me Dekretin nr. 11313, datë 15.10.2019 dekretoi emërimin e z. Besnik Muçi gjyqtar të Gjykatës Kushtetuese. Ky Dekret është botuar në Fletoren Zyrtare nr. 142, datë 22.10.2019.

17. Kolegji i Posaçëm i Apelit me vendimin nr. 32, datë 21.11.2019 ka vendosur: *“Ndryshimin e vendimit nr. 58, datë 01.08.2018, të Komisionit të Pavarur të Kualifikimit dhe shkarkimin nga detyra të subjektit të rivlerësimit Besnik Muçi, prokuror në momentin e fillimit të procesit të rivlerësimit, gjyqtar i Gjykatës Kushtetuese në momentin e shpalljes së këtij vendimi.”*

18. Në përfundim të veprimeve dhe procedurave të kontrollit dhe verifikimit të sipërcituara, nisur nga gjendja që rezulton nga kjo procedurë verifikimi për kandidatin Besnik Muçi, në zbatim të shkronjave “d” dhe “dh” të nenit 7/a të ligjit nr.8577/2000, neneve 235, 236 dhe 237 të ligjit nr. 115/2016, si edhe të pikave 104 dhe 111 të Vendimit nr. 4 datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, i ndryshuar, është proceduar me përgatitjen e relacionit përkatës për ndalimin e kandidimit duke e dërguar çështjen për shqyrtim në mbledhjen e Këshillit.

19. Në zbatim të pikës 33 të Vendimit të Këshillit të Emërimeve në Drejtësi nr. 4, datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, i ndryshuar, zv/Kryetari ka thirrur mbledhjen e Këshillit duke njoftuar anëtarët për zhvillimin e saj më datë 17.07.2020, ora 13 e 30, rendin e ditës, si edhe duke i bashkëlidhur njoftimit materialet e çështjes. Në rendin e

ditës është përfshirë edhe çështja me objekt verifikimin e procedurës së mëtejshme të kandidimit të z. Besnik Muçi, për vendin vakant të krijuar në Gjykatën Kushtetuese, vakancë e parakohshme, për shkak të mbarimit përpara afatit ligjor të mandatit të gjyqtarit Besnik Imeraj, vakancë e rishpallur më datë 27.09.2019, sipas gjetjeve të sipërpërmendura.

20. Në zbatim të pikës 34 të Vendimit të Këshillit të Emërimeve në Drejtësi nr. 4, datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, dita dhe koha e zhvillimit të mbledhjes, së bashku me relacionin e përgatitur nga relatori, i është njoftuar kandidatit Besnik Muçi, nëpërmjet postës elektronike zyrtare, në datën 13.07.2020.

21. I njëjti njoftim, së bashku me dokumentacionin e përgatitur nga relatori mbi veprimet e kryera gjatë procedurës së verifikimit, si edhe materiale të çështjes, i janë dërguar edhe Avokatit të Popullit.

22. Për zhvillimin e mbledhjes së Këshillit më datë 17.07.2020, ora 13 e 30, rendin e ditës dhe relacionin e përgatitur janë njoftuar edhe subjektet që sipas ligjit ftohen të marrin pjesë në mbledhjet e Këshillit.

23. Dita dhe koha e zhvillimit të mbledhjes, si edhe rendi i ditës janë njoftuar publikisht edhe në faqen zyrtare të Gjykatës së Lartë, në pjesën e caktuar për Këshillin e Emërimeve në Drejtësi.

24. Në mbledhjen e Këshillit, pas relatimit të parashtruar nga anëtari relator dhe shpjegimeve mbi pyetjet sqaruese të drejtuara nga anëtarët e Këshillit, Këshilli dëgjoi mendimin e Avokatit të Popullit lidhur me mënyrën e procedimit të ndjekur për verifikimin e kandidatit.

25. Në thelb, Avokati i Popullit parashtroi se ishte dakord me procedurën e ndjekur për verifikimin e kandidatit dhe se nuk kishte asgjë për të shtuar.

## **II. Vlerësimi i Këshillit të Emërimeve në Drejtësi**

26. Këshilli i Emërimeve në Drejtësi, duke pasur parasysh dispozitat ligjore dhe ato nënligjore normative të sipërcituara, bazuar në relacionin dhe aktet e dërguara nga anëtari i Këshillit relator, i caktuar për ndjekjen e procedurave për vendin vakant në Gjykatën Kushtetuese, vakancë e parakohshme, të shpallur nga Presidenti i Republikës në datën 07.02.2018, vlerëson se duhet të procedojë me shfuqizimin e vendimit që ka lejuar kandidimin e z. Besnik Muçi dhe të vendosë ndalimin e kandidimit të tij.

27. Në pikën 4 dhe 5 të nenit 125 të Kushtetutës, parashikohet se:

*“4. Gjyqtarët e Gjykatës Kushtetuese duhet të kenë arsim të lartë juridik, të paktën 15 vjet përvojë pune si gjyqtarë, prokurorë, avokatë, profesorë ose lektorë të së drejtës, nëpunës të nivelit të lartë në administratën publike, me një veprimtari të spikatur në fushën e së drejtës kushtetuese, të drejtave të njeriut ose në sfera të tjera të së drejtës.*

*5. Gjyqtari nuk duhet të ketë mbajtur funksione politike në administratën publike ose pozicione drejtuese në një parti politike gjatë 10 vjetëve të fundit përpara kandidimit. Kritere të tjera, si dhe procedura për emërimin dhe zgjedhjen e gjyqtarëve të Gjykatës Kushtetuese rregullohen me ligj.”*

28. Në pikën 1 dhe 2 të nenit 7/a të ligjit nr. 8577/2000, parashikohet se:

*“1. Gjyqtari i Gjykatës Kushtuese mund të zgjidhet shtetasi shqiptar që përmbush këto kushte:*

*a) të ketë zotësi të plotë për të vepruar;*

*b) të ketë mbaruar arsimin e lartë juridik, Diplomë e Nivelit të Dytë;*

*c) të mos ketë ushtruar funksione politike në administratën publike dhe të mos ketë mbajtur pozicione drejtuese në parti politike gjatë 10 viteve të fundit nga data e kandidimit;*

*ç) të mos jetë në procedim penal dhe të mos jetë dënuar me burgim për kryerjen e një vepre penale;*

*d) të mos jetë larguar nga detyra për shkaqe disiplinore dhe të mos ketë masë disiplinore në fuqi;*

*dh) të ketë kaluar me sukses procesin e kontrollit dhe verifikimit të pasurisë së tij personale dhe të familjarëve të tij, sipas ligjit.*

*2. Kandidati që përmbush kushtet e parashikuara në pikën 1 të këtij neni, duhet të plotësojë edhe këto kritere:*

*a) të ketë përvojë pune jo më pak se 15 vjet si gjyqtar, prokuror, avokat, profesor ose lektor i së drejtës, jurist i nivelit të lartë në administratën publike;*

*b) të ketë një veprimtari të njohur në fushën e të drejtës kushtetuese, të drejtave të njeriut ose sfera të tjera të së drejtës;*

*c) të jetë vlerësuar për aftësitë profesionale dhe integritetin etik e moral.”.*

29. Në zbatim të pikave 4 dhe 5 të nenit 125 të Kushtetutës, të pikave 1 dhe 2 të nenit 7/a të ligjit nr. 8577/2000, në përfundim të afatit të caktuar të shpalljes “Për hapjen e Procedurës së Aplikimit në Pozicionin Vakant Gjyqtar në Gjykatën Kushtetuese”, Këshilli i Emërimeve në Drejtësi, pasi ka administruar dokumentacionin e kandidatëve që kanë shprehur interes për këtë pozicion, ka filluar në datën 05.04.2019 procedurën e verifikimit të kandidaturave për plotësimin e kushteve dhe kritereve të kandidimit që parashikohen nga Kushtetuta dhe ligji.

30. Kushtet e kandidimit për Gjyqtar në Gjykatën Kushtetuese, të parashikuara nga Kushtetuta dhe ligjet e nxjerra në pajtim me të, sikurse janë edhe ato të përmendura në pikat 27 dhe 28 më sipër, duhet të plotësohen secili dhe të gjithë së bashku në mënyrë që kandidati të pranohet për t’u vlerësuar dhe renditur sipas meritave nga Këshilli i Emërimeve në Drejtësi dhe më tej për t’u përzgjedhur gjyqtar i Gjykatës Kushtetuese nga organi i emërtesës.

31. Për rrjedhojë, nëse kandidati për Gjyqtar në Gjykatën Kushtetuese nuk plotëson qoftë edhe njërin prej kushteve dhe kritereve ligjore të kandidimit, kjo do të përbënte shkak ligjor të mjaftueshëm për Këshillin e Emërimeve në Drejtësi për të vënë në bisedim dhe për të disponuar ndalimin e kandidimit, pa qenë më e nevojshme të arsyetojë për plotësimin ose jo të kushteve të tjera ligjore.

32. Kandidati Besnik Muçi është prokuror. Për rrjedhojë, është njëherazi edhe subjekt i procesit të rivlerësimit kalimtar të gjyqtarëve dhe prokurorëve. Prandaj, në zbatim të nenit 179/b të Kushtetutës dhe Aneksit “Rivlerësimi kalimtar i gjyqtarëve dhe prokurorëve” të saj, si dhe ligjit nr. 84/2016, Këshilli i Emërimeve në Drejtësi, për sa i përket verifikimit dhe kontrollit të pasurisë dhe të figurës, merr parasysh dhe mbështetet në konkluzionet e realizuara nga Komisioni i Pavarur i Kualifikimit dhe Kolegji i Posaçëm i Apelit.

33. Kolegji i Posaçëm i Apelimit me vendimin nr. 32, datë 21.11.2019 ka vendosur: *“Ndryshimin e vendimit nr. 58, datë 01.08.2018, të Komisionit të Pavarur të Kualifikimit dhe shkarkimin nga detyra të subjektit të rivlerësimit Besnik Muçi, prokuror në momentin e fillimit të procesit të rivlerësimit, gjyqtar i Gjykatës Kushtetuese në momentin e shpalljes së këtij vendimi.”*

34. Në shkronjën “d” të pikës 1 të nenit 7/a të ligjit nr. 8577/2000, të sipërcituar përcaktohet si kusht ligjor për lejimin e kandidimit që kandidati të mos jetë larguar nga detyra për shkaqe disiplinore dhe të mos ketë masë disiplinore në fuqi.

35. Vendimet e organeve të rivlerësimit kalimtar për shkarkimin nga detyra të magjistratëve, përbëjnë njëkohësisht masë ekstreme disiplinore ndaj tyre. Ndërkohë, në shkronjën “d” të pikës 1 të nenit 7/a të ligjit nr. 8577/2000, kjo masë disiplinore përbën shkak për ndalimin e kandidimit.

36. Në aktin nënligjor normativ, Vendimi i Këshillit të Emërimeve në Drejtësi nr. 4, datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, i ndryshuar, në pikat 104 dhe 111 parashikohet se:

*“104. Kandidatët magjistratë dhe subjektet e tjerë që i nënshtrohen procedurës së rivlerësimit kalimtar sipas ligjit nr. 84/2016, për të cilët nuk është dhënë vendim nga Komisioni i Pavarur i Kualifikimit, nuk i nënshtrohen procedurës së verifikimit të pasurisë dhe të integritetit nga Këshilli. Vendimi i Këshillit, për urdhërimin e lejimit ose të ndalimit të kandidimit sipas neneve 235 dhe 236 të ligjit nr. 115/2016 për këta kandidatë, do të mbështetet në vendimin përfundimtar të rivlerësimit kalimtar.”.*

*“111. Kandidatët magjistratë dhe subjektet e tjerë që i nënshtrohen procedurës së rivlerësimit kalimtar sipas ligjit nr. 84/2016, të cilët nuk janë konfirmuar në detyrë me vendim të Komisionit të Pavarur të Kualifikimit, edhe kur ndaj atij vendimi është paraqitur ankim, nuk lejohen të kandidojnë dhe nuk i nënshtrohen procedurës së verifikimit të kushteve dhe kriterëve të tjera ligjore të kandidimit sipas neneve 235, 236 dhe 237 të ligjit nr. 115/2016.”.*

37. Nisur nga sa analizohet dhe arsyetohet më sipër, bazuar në gjetjet dhe të dhënat e konstatuara gjatë procedurës së verifikimit që rezultojnë nga aktet dhe dokumentacioni që përmban dosja e kandidimit, në interpretim dhe zbatim të ligjit të zbatueshëm për kushtet dhe kriteret e kandidimit për anëtar i Gjykatës Kushtetuese, Këshilli i Emërimeve në Drejtësi vjen në përfundimin se duhet të vendoset ndalimi i kandidimit të kandidatit Besnik Muçi në vendin vakant për gjyqtar në Gjykatën Kushtetuese, vakancë e parakohshme, të shpallur nga Presidenti i Republikës në datën 07.02.2018.

38. Në kushtet kur për kandidatin Besnik Muçi është lejuar kandidimi me vendimin nr. 70, datë 24.07.2019 të Këshillit të Emërimeve në Drejtësi, ky vendim duhet shfuqizuar për arsyet e cituara më lart, për të proceduar më tej me ndalimin e kandidimit të këtij kandidati për pozicionin vakant të shpallur nga Presidenti i Republikës më datë 07.02.2018, rishpallur për plotësim me kandidatura të tjera më datë 27.09.2019.

## PËR KËTO ARSYE:

Në mbështetje të nenit 125 të Kushtetutës, të pikës 1, shkronja “d” të nenit 7/a të ligjit nr. 8577, datë 10.02.2000 “Për organizimin dhe funksionimin e Gjykatës Kushtetuese në Republikën e Shqipërisë”, i ndryshuar, të ligjit nr. 115/2016 “Për organet e qeverisjes së sistemit të drejtësisë”, si edhe të pikave 50, shkronja b, dhe 51 të Vendimit të Këshillit të Emërimeve në Drejtësi nr. 4, datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, i ndryshuar, Këshilli i Emërimeve në Drejtësi,

## VENDOSI:

1. Shfuqizimin e vendimit nr. 70, datë 24.07.2019 të Këshillit të Emërimeve në Drejtësi “Për lejimin e kandidimit të kandidatit Besnik Muçi, në vendin vakant për gjyqtar në Gjykatën Kushtetuese, vakancë e parakohshme, të shpallur nga Presidenti i Republikës më datë 07.02.2018”.
2. Ndalimin e kandidimit të z. Besnik Muçi, për vendin vakant për gjyqtar në Gjykatën Kushtetuese, vakancë e parakohshme, të shpallur nga Presidenti i Republikës në datën 07.02.2018, rishpallur për plotësim me kandidatura të tjera në datën 27.09.2019.
3. Në zbatim të nenit 238 të ligjit nr. 115/2016, ky vendim i njoftohet kandidatit Besnik Muçi.
4. Kandidati Besnik Muçi ka të drejtën e ankimit në Gjykatën Administrative të Apelit, jo më vonë se 5 ditë nga dita e njoftimit të vendimit të arsyetuar.
5. Ky vendim publikohet në faqen zyrtare të Gjykatës së Lartë, në pjesën e përcaktuar për Këshillin e Emërimeve në Drejtësi.

Zv/KRYETARE  
Vitore TUSHA

